

## Les Chanterelles 2022

D Fasnacht findet statt, das isch e Senseischen  
wirsch usgränzt isch das e Dircrimineischen  
übersetzisch das Wort eso wie mi Sohn  
heisst's im wohrschte Sinn: Dis-Krimi-Nation

Das Jahr gitt's z Lauffe nume ne Fasnacht light  
s glych Thema macht sich im Laufner Notfall breit  
vier Moll is Stedtli ohni Auti, hett d IG gseit  
hoffentlich goht dä Trend nid wyter eso  
süscht mues nächst Jahr eini vo de Schanterell eleini cho...

D Maske sin verschide ysetzbar  
als Chnü-Schoner göhn si wunderbar  
am Elleboge goht's au, klar!  
s bruucht eifach chli Polster innehar

Sogar als BH, lueg emoll  
dr Bügel isch derby, so toll  
eimoll e Bängel, der zweit isch dä  
wenn's nötig isch, chasch au do no Polster gäh

Ei Buechstabe chönne mir nimm gseh  
s isch der 7. vom Alphabet, s grosse „G“  
dä duet eus i de Auge so weh  
kombiniert mit ere Zahl, grad no vill meh

RnR bedüet Rock'n'Roll  
d Strecki vo dr RhB isch ganz toll  
R+J stoht für Raphi und Jölle  
RS heisst: rassigi Schanterelle

Ei Buechstabe gfallt eus megaguet  
es isch s «M», dä macht eus vill Muet  
mitenanger, Musig, Müntschi, Melodie  
mir Mensche mache's möglich mit Magie

4 Jahr lang hei mir ei Thema chönne ufgriffe  
vo Amerika der Presidant, die Pfyffe  
jetz isch er wäg vom Fänster, plötzlich wäre mir froh  
mir hätte d Corona nümme, derfür dä Trampel no

Schribsch e Läserbrief und schicksch en am Wucheblatt  
er isch persönlich, aktuell und cheibeglatt  
s Gaby entscheidet, si hett ke Wahl  
er mues kritiklos sy, eifältig und banal

Im Laufetal bout d SBB e Doppelspur  
bis das realisiert isch, bruuche mir Usduur  
bim Ungertor wird grisse und ufbaut  
bim Wucheblatt Qualität und Personal abbaut

Bisch du e Maa oder e Frau oder s dritte Gschläch  
jede entscheidet sälber, s isch nid meh als rächt  
Non-binär, Genderfluid oder Trans  
e eidütig Zeiche isch nid emoll meh der Schwanz

Als Murmeltier wäre mir gärn gebore  
mit weichem Fäll, und härzig chlyne Ohre  
im Herbst frässe mir so vill mir chönne  
e lange Winterschlof düen mir eus gönne  
im Früelig aber, denn settsch eus gseh  
hei mir e Bikini-Figur, schöner denn je!  
Das nützt eus gar nüt als Murmeltierfrau  
die hei kei Bikini, kei Modeschau.  
S beste isch am Murmeltier-Läbe  
mir chönne jedem Wanderer, und das nid vergäbe  
nochepfiffe, mir lachen eus chrumm  
ein nach em anger dräit sich nach eus um

En angeri Option, die wär als Chatz  
si gniesst ihri Freiheit, bestimmt ihre Platz  
duet gärn schmuuse, do und do und do und dört  
über das hett sich bin ere Chatz no niemmer empört

S goht nimm lang, Jakarta verschwindet im Wasser  
d Stadt wird z Borneo neu ufbout, s wird immer wie krasser  
i däm Loch wo dört entstoht wette mir gärn  
versänke: alli Politiker und Virologe vo Bärn

E Zertifikat, das isch so öppis wie ne Diplom  
für ne guetti Leischtig wie ne italiänisch-Kurs z Rom  
Zeritifikat - das Wort wird missbruucht, isch aberheit  
usser das vo der Musigschuel, und s First Certificate  
sogar Pflanze und Strüücher chönne eis becho  
wenn si im Garte vo der EGK dörfe stoh

D Fasnacht light hei mir eso umgesetzt  
mir hoffe dass euser Publikum das schetzt  
d Schnitzelbängg zum Läse gitt's nume digital  
derfür si mir live do und dreidimensional

Zum Schluss gäbe mir die nöischte Zahle bekannt:  
100 % vo euch do inne sin tolerant  
100 % vo euch, das isch frappant  
sin Mensche und dodermid enanger verwandt